

## Paur kute Garaxakam me jamã pi'ôk no'ôk ne ja.

Paur ne pykabê Garaxakam me jamã pi'ôk no'ôk ne. Nãm arým pyka kunĩ'ÿr mrãnhkôt me'ÿr bôx ne memã Jeju jarê nhyr me kwÿ arým tu amim markumrêx ne 'a abeno akprô. Nhyr kam Paur arým mã me jadjwÿ'ÿr tẽ nhyr tekrekam mebê idjaer kwÿ me'ÿr bôx ne memã kum,

—Djãm ar aje tu amim Jeju markambit Metĩndjwÿnh kute ar apytàr? Kati, dja gar prĩne Môj djê kukràdjãdjwÿ kôt ar amijo aban kam arým Metĩndjwÿnhmã amex, ane.

Nhyr kam Paur memã kum,

—Arkati. Mrãmri ne me tu amim Jeju markumrêx nhyr Metĩndjwÿnh arým memã axwe kêt jarê nhyr me arým kum mex. Me ta ne me mÿjja kukràdjãkôt amijo bakôt Metĩndjwÿnhmã mex kêt. Mrãmri ne me tu amim markumrêx nhyr Metĩndjwÿnh ukaprikôt arým memã axwe kêt jarê, ane.

Djã nãm ã Abraão Môj djê kukràdjãkôt amijo bao ane nhyr Metĩndjwÿnh arým kum axwe kêt jarê? Kati, nãm tu Metĩndjwÿnh markumrêx ne arým Metĩndjwÿnhmã mex. Nhyr amũ tũmrãm Môj djê katon memã kukràdjã jarê. Bir be, gwaj badjwÿ tu amim Jeju markumrêx ne arým kênhkam ar baba. Gwaj bajaxwe kute gwaj bate djê pyrãk ne gwaj babê Metĩndjwÿnh kurê. Nhyr Metĩndjwÿnh arým bajaxwebê bapytà. Arým ne gwaj bate djê apêx. Mÿkam dja gwaj akubyn Môj djê kukràdjã tũmo amite djê ar o baba? Kati, Jeju kute gwaj bajãpre bônhkam gwaj kênhkam ar babakam gwaj Jeju kukràdjã

ny kôt amijo baba rã'ã. Nãm ã Paur memã anen ajte memã Jeju kute anor kôt memã amijarẽ. Tãm ne ja.

<sup>1</sup> Ba ne ba ibê Paur. Djãm pykakam me'õ kajgo ne ijano? Nàr, djãm Metĩndjwỳnh ne me'õ kajgomã ijã karõ nhym ijano? Kati. Jeju Kritumẽ Bãmbê Metĩndjwỳnh ijano ba arkum idjãpênh iba. Jeju Kritu arỳm ty nhym Bãm akubyn o tĩn ne. <sup>2</sup> Jeju kukwakam bakamydjwỳ ikôt dja bar wãm ar amã ikabẽn mex jarẽ. Pi'ôk no'ôkkam ar amã arẽ. Pykabê Garaxakam apỳnh ar aje amim Jeju mar ne kôt ar aben pydjio aba djãri ne ba ar amã ikabẽn mex jarẽ.

<sup>3</sup> Metĩndjwỳnhbê ne me Babãm. Ne Bẽnjadjwỳr djwỳnhbê ne Jeju Kritu. Gê ar tu kum ar akaprĩn\* ar ajo ba gar adjumar mex rã'ã ne. <sup>4</sup> Jeju Kritu ne gwaj bakadjy amingã. Nãm gwaj bajaxwe pãnh ty. Me kum Metĩndjwỳnh kĩnh kêtja ne me axwe:. Mekôt bajaxwe kêt kadjy gwaj bapãnh ty. Kute kubê gwaj bapytãr kadjy gwaj bapãnh ty. Me Babãmbê Metĩndjwỳnh kute kum 'ã karõ kôt ne gwaj bapãnh ty. <sup>5</sup> Metĩndjwỳnh ne ra:x ne uma:. Gê me aben djô'ã memã Metĩndjwỳnh rax jarênh rã'ã: rã'ã ne. Mrãmri, tãm ne ja.

*Me memã Kritu kupa'ã ujarênh nhym mebê uma.*

*Mat 7.15; Ep 4.14; Kor 2.8; A Ped 2.1*

<sup>6</sup> E kum, djãm ar ga ne gar ajaxwe kêt nhym Metĩndjwỳnh pãnh kum ar akaprĩn amiwỳr ar ajuw ne ar ajo ba? Kati. Ar ga ne gar ajaxwe: nhym ta kum ar akaprĩ. Kritu ar ajaxwe pãnh ty nhym kam Metĩndjwỳnh ta kum ar akaprĩn amiwỳr ar ajuw ne ar ajo ba. Nhym kam wãnh me kwỳ ar awỳr bôx ne arỳm 'êx ne ar amã we Kritu'ã ujarênh ny 'ôdjwỳ jarẽ. Me wãnh ar amã arẽ gar arỳm

---

\* 1:3 Djãm ar ga ne gar adjukaprĩ nhym ar pãnh arỳm kum ar akaprĩ Kati. Ar ta ne ar tu kum ar akaprĩkumrêx.

ijaêrbê me'ÿr amijo akêx ne mekôt amijo abao dja. <sup>7</sup> I:je. Djâm mrâmri ne me ar amã Kritu'ã ujarênh ny jarê? Kati. Nãm me arîk ar anoo biknoro ba. Kritu kupa'ã ne me ar amã arênh ba.

<sup>8</sup> Arÿm ne bar kàj bê ar amã arê, katàt Kritu'ã ujarênh nykumrêx jarê gar arÿm amim ama. Nhym be, godja ar ijô akubyn ar awÿr bôx ne ar amã Kritu kupa'ã ajte ujarênh ny 'ôdjwÿ jarênh jabej gê Metîndjwÿnh on pãnh o akno gê biknor rã'ã rã'ã ne. Nâr, godja kàjkwakam kadjy mrãnh djwÿnh 'ô ar awÿr bôx ne ar amã kupa'ã ujarênh ny 'ôdjwÿ jarênh jabej gê Metîndjwÿnh on pãnh o akno gê biknor rã'ã: rã'ã ne. <sup>9</sup> Bar ajte jakam ar amã arê gar ama. Arÿm ne bar katàt ar amã Kritu'ã ujarênh nykumrêx jarê gar amim ama. Nhym be, godja me'ô ar awÿr bôx ne ar amã Kritu kupa'ã ajte ujarênh ny 'ôdjwÿ jarênh jabej gê Metîndjwÿnh on pãnh o akno gê biknor rã'ã: rã'ã ne.

<sup>10</sup> Djâm me kum ikînhmã ne ba abej ar iba? Kati. Metîndjwÿnh kum ikînh ne ba abej. Djâm ije meo kînh prãm got? Kati. Ne ba ren meo kînh prãm ba ren ibê Metîndjwÿnh nhô àpênhkumrêx kêt.

*Jeju ta ne Paurmã amijarê.*

*A Kô 1.12; Tex k 2.4*

<sup>11</sup> Akmere, àpnhîre ar, ba ar amã arê. Ije kàj bê ar amã Kritu'ã ujarênh ny jarênhja djâm me'ô ta ne amim ujarênh'ã karôn imã arê? Kati. <sup>12</sup> Djâm me kute aben djô'ã ujarênh ar baja ne me'ô imã arê ba o iba? Kati. Nâr, djâm me'ô kute prîne ujarênh marja ne imã arê ba kuma? Kati. Jeju Kritu ta ne imã ujarênh ny jarê ba maro iba. Tãm ne ba jakam pi'ôkkam wãm pykabê Garaxakam ar amã arê.

<sup>13</sup> Arÿm ne me ar amã ijã ajarê gar ama. Amrêbê ne ba mebê idjaer kukràdjà kôt ar amijo iban Metîndjwÿnh nhô me ja kute amim Jeju maro ibikênh kumex. Ne kam me kute amim Jeju mar kêt kadjy mebê Jeju kurên abenbê

me ngrànho iba. <sup>14</sup> Ne mebê idjaermê ro'ã ijabatànha ije me kukràdjà maro me akrenh mexo tẽ. Ne me ikukãmãre kukràdjà tùm'ã ino tỳ:x ne o iba.

<sup>15</sup> Nhyam kam Metĩndjwỳnh ta arỳm kum ikĩnh ne kum ikaprĩ. Djãm ba ne ba imã kĩnh nhyam kum ikaprĩ? Kati. Ta ne tu kum ikaprĩn arỳm amiwỳr ijuw ne ijo ba. Adjàkamã inã tikkrekam ijêtri ne Metĩndjwỳnh amijo ipytà.

<sup>16</sup> Ije kàj bê me bajtemmã 'ã idjujarênh kadjy arỳm imã Krao amirĩt. Kute imã Krao amirĩtkam djã nã bãm o me'õ kumrêx ma nhyam arỳm imã arê ba ô'ã memã arênho iba? Kati. Kritu ta ne imã arê. <sup>17</sup> Nàr, djã ne ba krĩraxbê Djeruxarê kumrêxmã tẽn bôx? Nãm Jeju ar ja kumrêx janon kam badjwỳ ijano ba kum idjapênh ar iba. Djã nã bãm Jeju kute ar anor ja kumrêx'ỳr Djeruxarêmã tẽn bôx nhyam ar imã kabên'õ jarê ba memã arênho iba? Kati. Ar'ỳr Djeruxarêkam itêm kêt. Ate ne ba pykabê Arabijkam tẽ. Ba kam ajte akubyn krĩraxbê Tamagumã akêx. Kritu ta ne imã kabên jarê ba memã arênho iba. Tãm ne ba jakam pi'ôkkam wãm pykabê Garaxakam ar amã arê.

<sup>18</sup> Nhyam kam ijã amex amãnhkrut ne ikjêkêt apêx. Kambit ne ba arỳm Djeruxarê'ỳr tẽ. Ije Pedru pumũnhmã 'ỳr tẽ. Ne kam Pedru'ỳr bôx ne ar iro'ã nhỹ. Ar iro'ã nhỹ: nhyam ar ijã akatibê 15bit apêx ne. Djã ne ba kam idjãm 'iry got Pedru imã me kabên 'õ jarê ba memã arênho iba? Kati. <sup>19</sup> Djã ne ba kam Jeju kute ar anorja 'õdjwỳ pumũ? Kati. Ije ar 'õ pumũnh kêt. Bẽnjadjwỳr djwỳnh kamy axikôt katorja ne kubê Xijagu. Xijagubit ne ba omũ.

<sup>20</sup> Djã nã bãm ar amã ijêx? Kati. Metĩndjwỳnh kute imarkam ne ba mrãmri ar amã ikabênkumrêx.

<sup>21</sup> Ne kam Djeruxarê kurũm ikaton tẽ. Tê:n kajõnhkôt pykabê Xirijmê Xirxij'ỳr tẽ. Tê:n kam arỳm kam bôx.

<sup>22</sup> Nhyam Djeruxarê bu'ã pykabê Djudêjakam apỳnh me kute amim Jeju mar ne kôt ar aben pydjio ba djàri me kute

ipumũnh kêt rã'ã. <sup>23</sup> Nhyr be, me kwỳ ne me amũ memã ijarẽn memã kum,

—Paur kute me bajo bikẽnho ba ja ne arỳm jakam kàj bê Kritu'ã memã ujarẽnh ar ba. Me kute Kritu kôt amijo bamã memã 'ã ujarẽnh ar ba. Me kute Kritu mar kêt kadjy ne Paur amrêbê mebê Kritu kurêo ba. Ne jakam arỳm 'ã memã ujarẽnh ar ba. Nãm me ã ijarẽnho ane. <sup>24</sup> Nhyr me arỳm jabit man ikam Metĩndjwỳnhmã mextire jarẽnho kumex. Be, djãm kam ne me'õ ikabẽn'ã imã karõ ba memã arẽnho iba? Kati. Kritubit ne imã arẽ ba arỳm pi'òkkam wãm pykabê Garaxakam ar amã arẽ.

## 2

*Pedru ar kute Paur kabẽn'ã aben mar.*

*Kar 15.4*

<sup>1</sup> Nã bãm ar iba: nhyr kam ijã amexbê 14 apêx. Ba kam Banabekôt Djeruxarẽmã tẽ. Xitudjwỳ ne ba o tẽ.

<sup>2</sup> Metĩndjwỳnh ta ne imã 'ã karõ ba kabẽn kôt 'ỳr tẽ. 'Ỳr tẽ:n kam arỳm 'ỳr bõx. Ne kam me krãptĩ kàxã me rũnh kumrẽxmẽ ro'ã akuprõ. Me kute amim Jeju mar rũnhmẽ ro'ã akuprõ. Memãbit ar rũnh pyràkjamẽ ro'ã akuprõ. Ne kam memã arẽ. Ije me bajtemmã Kritu'ã idjujarẽnh ny jarẽnho ibaja ne ba memã arẽ. Ne ba ren Djeruxarẽkam me krãptĩ kumrẽxmã arẽn ren kam te memã arẽ nhyr ren me kute imar kêt ne. Nhyr be, kati. Me krãptĩ kàxã ne ba me rũnh kumrẽxmã arẽ.

<sup>3-4</sup> Nhyr Xitubê me bajtembê kreguja ikôt dja. Me ja ne me kute Mõjdjê kukràdjà kôt amijo ba kêt ne my nhinhu kà tã. Nãm Xitu ikôt dja. Nhyr me ta kute amijo 'êx ne kute amijo Jeju mar mexja ne me arỳm apdjun mekôt wadjà. Bar Kritu Jeju kabẽn kôt idjumar mex ne ar ibamã nhyr me amim,

—Paur ar kute Môj djê kukràdjà kôt amijo ba katàt jabej ba ar omũ. Gêdja ar kôt amijo ba kêt ba me kukràdjà'ã arkum apnê, ane. Ga, me ta te: kute Môj djê kukràdjà kôt amijo ba mexja pumũ. Ne te: Metĩndjwýnhmã amijo mexo ban umar punu. Ar idjumar punu ja kadjy ne me ã amim ar ijã ane. Ne kam te: kute Xitu my kà krã'yrmã memã 'ã apnê. Djã ne me kute amim Jeju markam me rũnh ja ne mekôt kabên dji? Kati. Me mekôt kabên djir kêt ne kute,

—Gê ar Môj djê kukràdjà kôt amijo tẽn on Xitumã my kà ta, anhÿr kêt kumrêx.

<sup>5</sup> Djãm ar ba ne bar me ta kute amijo Jeju mar mexja kabên kôt Xitu my kà krãta? Kati. Bar me kabên kôt Môj djê kukràdjà kôt amijo itêm kêt kumrêx. Mÿkam? Bir, ne ba ren ar mekôt amijo tẽn my kà krãta gar ren ikôt Môj djê kukràdjà maro aban kôt ar amijo aba. Ne kam ren arÿm Kritu kabên katàt mar kêt ne kôt amijo aba kêt. Amrêbê ne bar ar amã katàt Kritu'a'ã ujarênh ny jarê gar kôt ar amijo aba. Kôt amijo aba rã'ã kadjy ne bar me ja kôt amijo iba kêt kumrêx.

<sup>6</sup> Nhym be, memãbit ar kute rũnh pyræk ja, me kute ar'ã abenmã kum,

—Amrêbê ne ar gwaj bamã wan gwaj bajo ba. Gwaj bamã ne ar raxkumrêx, anhÿrja. Djãm me kute ar rũnh'ã abenmã anhÿrkam djãm imã ar uma? Kati. Memãbit ne ar kute rũnh pyræk. Nhym be, Metĩndjwýnhmã ne ar ngri:ren kajgo. Bir be, Kritu ne imã kabên jarê. Djãm ijukri ne ar rũnh imã mÿjja 'õdjwÿ jarê ba kam memã arênhõ iba? Kati. Ar kute ijukri imã mÿjja'õ jarênh kêt kumrêx.

<sup>7</sup> Ne kam ar ipa krij ne ar itatakbit. Arÿm ne ar kute imar ne ar abenmã kum,

—Be, mrãmri ne Metĩndjwýnh Paurmã kum, “Ga dja ga me bajtemmã Kritu'a'ã ujarênh ny jarê”, anhÿrkumrêx. Nãm ar ã abenmã ane.

<sup>8</sup> Metĩndjwỳnh ne mebê idjaermã Pedru jano nhym arỳm memã Kritu'ã ajarẽ. Ga, me krãptĩ: arỳm kute tu amim markumrẽxja pumũ. Metĩndjwỳnh ajte badjwỳ ijano ba me bajtemmã 'ã ajarẽ. Ga, me jadjwỳ krãptĩ tu kute amim markumrẽxja pumũ. <sup>9</sup> Xijagumẽ Pedrubê Xepamẽ Djuãomẽ ne ar kumrẽx tũm. Ar memãbit rũnh. Ar ja ne ar amim,

—Mrãmri ne Metĩndjwỳnh ta kum Paur kaprĩ:kumrẽx nhym mrãmri arỳm kôt kum àpênhkumrẽx, ane. Nãm ar anen arỳm Banabemẽ bamẽ ar ipa krij ne ar itatak ne ar imã,

—Mrãmri ar ga dja gar me bajtem'ỳr mrãn memã 'ã ajarẽ. Nhym be, ar ba dja bar mebê idjaer'ỳr mrãn memã 'ã ajarẽ, ane. <sup>10</sup> Ne kam ar imã,

—Dja gar ar ikam me õ mỳjja kêt mar rã'ã, ane. Jabit ne ar ar imã arẽ. Ba kam arỳm ar kuman amũ memã me arẽnho iba nhym me arỳm memã mỳjjao atomo ba. Nã bãm ã Djeruxarẽkam me maro anen arỳm pi'òkkam wãm pykabê Garaxakam ar amã arẽ.

*Paur Pedrumã kabẽn ne.*

<sup>11</sup> Bar kam krĩraxbê ãxikimã tẽn bõx ne kam dja. Nhym kam Pedru nĩnh tẽn kam ãxikikam ar iwỳr bõx. Ba kam arỳm kuka kônkh kum ikabẽn ne. Arỳm Metĩndjwỳnh kabẽn kupa'ã kute amijo tẽmkam ne ba kum ikabẽn ne.

<sup>12</sup> Mỳkam? Bir, amrêbê ne Pedru tu me bajtemmẽ ro'ã àkuro krĩ. Ar ba ne bar me bajtemmẽ ro'ã idjàkuro nhỹ nhym Pedru mekmẽ ro'ã àkuro nhỹ. Nhym kam me kwỳ Mõjdjê kukràdjà'ã no tỳxja arỳm bõx. Xijagu kurũm ne me bõx. Me ja ne me memã kum,

—Dja me me bajtemmẽ ro'ã àkuro krĩn arỳm Mõjdjê kukràdjà kupa'ã amijo tẽ. Nãm me ã memã anhỹro ba. Me ja bõx nhym Pedru arỳm me omũ. Ne kam arỳm me bajtemmẽ ro'ã õ kwỳ krẽn krãtan arỳm ate nhỹ. Me

Môjdjê kukràdjà'ã no tỳxja, me my kà rênhneja, kute 'ã kum kabên karõ ne Pedru ate nhỹ. Me ja kute kum,

—Kwãrik wãnh me bajtemmẽ ro'ã adjàkur kêt. Abê mebê idjaer. Môjdjê ne me bamã, “Kwãrik wãnh me bajtemmẽ ro'ã adjàkur kêt”, ane ga kam me ro'ã adjàkuro akrĩ, anhỹr karõ ne Pedru ate nhỹ.

<sup>13</sup> Nhyam kam ar ikam mebê idjaer kunĩ Pedru kôt amijo mõn ate ar ibê nhỹ. Nhyam kam Banabedjwỳ arỳm rerekre ne me umaje kôt amijo tẽn ate me bajtembê amijo tẽn ate ar ibê nhỹ.

<sup>14</sup> Ba kam me omũ. Kritu'ã ujarẽnh ny ne katàtkumrẽx nhyam me arỳm kupa'ã amijo mõ ba arỳm me omũn arỳm Pedrumã ikabên ne. Me kunĩ nhipôkri ne ba 'ã kum ikabên ne kum,

—E kum, ga ne ga arỳm me bajtem kôt ar amijo aban ajte. Ga arỳm mebê idjaer kukràdjàbê amijo akẽx ne arỳm me bajtem kôt ar amijo aba. Mỳkam ne ga arỳm jakam ajte mebê idjaer kukràdjà kôt me kute amijo ba'ã me bajtemmã karõo dja? Nã bãm ã Pedrumã ikabêno ane.

<sup>15</sup> Ne kam ajte Pedru arkum,

—Mrãmri me bakukãmãkjê kôt ne gu me babê idjaerkumrẽx. Me baje me bajtem'ã abenmã kum, “Me axwe”, anhỹro baba. Djãm me baje me wã kôt amijo baba got? Arkati. Me ba ne gu me babê idjaerkumrẽx. <sup>16</sup> Djãm kam me kute Môjdjê kukràdjà kôt amijo bakam ne me mrãmri axwe kêt? Kati. Me kute kukràdjà kôt amijo baja ne me te axwe kêt prãmje. Nhyam be, me tu kute amim Jeju Kritu markumrẽx. Nhyam kambit arỳm memã axwe kêt jarẽ nhyam me kum axwe kêt. Tãm ne gwaj amrêbê kuma. Me bajtemja ne me tu amim Kritu markumrẽx. Gwaj badjwỳ ne gwaj bajaxwe kêt kadjy tu amim Kritu Jeju markumrẽx. Djãm gwaj bajaxwe kêt kadjy ne gwaj baje Môjdjê kukràdjà marn kôt ar amijo baba? Kati. Kadjy



ne gwaj tu amim Kritu markumrëx. Djãm pykakam me'õ ta axwe kêt prãm? Arkati. Me'õ ta kute Môj djê kukràdjà marn kute kêt amijo bakam te: axwe kêt prãmje. Nã bãm ã Pedru arkum ane.

<sup>17</sup> Ne kam ajte arkum,

—Me'õ ta ne te axwe kêt prãmje. Nhym be, dja gwaj tu amim Kritu markumrëx ne arÿm bajaxwe kêt. Ne kam amim Kritu maro tẽ nhym arÿm gwaj bamã bajaxweo amirito tẽ gwaj arÿm amima. Gwaj baje amimarkam djãm gwaj baje me kwÿ kudjwa amim, “Ije amim Kritu kabën markôt ne ba ijaxwe”, anhÿr mã? Arkati. Kritu kute me axwe'ã memã àpnênh kêt. Kabënkôt me'õ axwe prãm kêt kumrëx. <sup>18</sup> Be, amrëbê ne gwaj te: Môj djê kukràdjà kêt bajaxwe kêt prãmje bajaxwe rã'ã ne. Nhym be, jakam ba arÿm kubê amijo akëx. Kubê ije amijo akëxkam ba ren ar akudjwa ren akubyn Môj djê kukràdjà'ÿr amijo akëx ne ren amim,

—Ba Môj djê kukràdjà man kêt ar amijo iban arÿm ijaxwe kêt, anhÿro iba. Djãm kam ba ren mrãmri ijaxwe kêt? Arkati. Akubyn ije 'ÿr amijo akëxkam ba ren arÿm Metĩndjwÿnh kabën mar kêt ne kam ren kam amikrà ar o iba.

<sup>19</sup> Amrëbê ne ba amim,

—Ba Môj djê kukràdjà man kêt ar amijo iban arÿm ijaxwe kêt, anhÿro iba. Djãm kam mrãmri ijaxwe kêt? Kati. Ijaxwe rã'ã. Ne kam arÿm Môj djê kukràdjà ma. Amrëbê ne Môj djê memã kum, “Dja me axwe arÿm pãnh ty”, ane. Tãm ne ba kuman kam ijaxwe man kam arÿm amim,

—Kati. Dja ba Môj djê kukràdjà man kêt ar amijo iban te ijaxwe kêt prãmje, ane. Kam ne ba arÿm Môj djê kukràdjà kêt ar amijo iba kêt. Ga, me arÿm tykkam kute kêt amijo ba kêtja pumũ. Badjwÿ ije me tyk pyræk. Ne kam arÿm Metĩndjwÿnh kadjy itĩn ne ar iba.

<sup>20</sup> Ba ne ba Kritumě ro'ã pĭte'ykam ty. Ne kam ba itĭn ne ar iba kĕt. Kritu ta ne ikam tĭn ne ar ba. Nã bãm ã amimaro ane. Ne kam inhĭ jakam itĭn ne ar iba jakam ne ba tu amim Metĭndjwĭnh kra markumrĕx ar o iba. Ta ne kum ijabĕn ijaxwe pãnh ty. <sup>21</sup> Nãm Kritu ã kum ikaprĭ o ane. Djã nã bãm kubĕ ate ikrãn Mõjdjĕ kukràdjãbit mar 'ãno dja? Djã nã bãm ijaxwe kĕtmã kukràdjãbit man o Kritubĕ aptã? Kati. Ne ren me Mõjdjĕ kukràdjã kõt ren axwe kĕt nhym ren kam Kritu me axwe pãnh tykja ren kajgokumrĕx. Nhym be, kati. Kritu kõtbit ne me axwe kĕt. Nã bãm ã Pedru arkum anen ajte pi'õkkam wãm pykabĕ Garaxakam ar amã arĕ.

### 3

*Me ta kute amijo mex kĕt.*

*Ep 2.8; Pir 3.9; A Xim 1.9; Xit 3.5*

<sup>1</sup> Ar abĕ Garaxa ar, ar ano rere:kre. Mÿj me'õ ne ar amã 'ĕx ne ar anoo akno? Ĕ, Metĭndjwĭnh kabĕn katãtkumrĕx. Kabĕn kõt ar aje amijo aba kĕt kadjy ne me ar anoo akno. Arÿm ne ba prĭne ar amã Kritu pĭte'y'ã jĕt'ã ajarĕ gar prĭne ama. Nhym kam me ar anoo akno. Ar ano rere:kre.

<sup>2</sup> Dja gar ar imã arĕ ba kuma. Djã nã gãm ar Mõjdjĕ kukràdjã man kõt ar amijo aban kõt we ajaxwe kĕt? Djã nã gãm we ar ajaxwe kĕt nhym Metĭndjwĭnh Karõ arÿm ar awÿr bõx ne ar ajo ba? Dja gar imã arĕ ba kuma. Kati. Nã gãm ar Kritu'ã idjujarĕnh man tu amim Kritu markumrĕx nhym Karõ arÿm ar awÿr bõx. <sup>3</sup> Nã gãm ar Metĭndjwĭnh Karõkõt amijo abamo krax. Djã nã gãm jakam Mõjdjĕ kukràdjã man kõt ar amijo aban aje kõt ga: we amijo amexmã.

<sup>4</sup> Amrĕbĕ ar aje Kritu mar'ã ne me ar ajo bikĕnho ba gar arÿm kadjy atokry kumex ma. Godja gar jakam kubĕ amijo akĕx ne 'ã adjukanga jabej nhym arÿm kadjy ar atokry ja

arým kajgo. Nhy m be, kati. Ar aje mrãmri tu amim Kritu markumrêx rã'ã jabej arým atokryja kajgo kê t. <sup>5</sup> Djã nã gã m ar Mõjdjê kukràdjã man kõt ar amijo aban kõt we ajaxwe kê t nhy m kam Metĩndjwýnh arým ar amã Karõ jano nhy m kam ar akam mýjja pumũnh kê t nhipêx, ar akam apýnh me punuo mex? Kati. Nã gã m ar Kritu'ã idjujarênh man tu amim markumrêx nhy m arým kõt ar amã Karõ jano nhy m kam arým ar akam apýnh mýjja pumũnh kê t nhipêx.

<sup>6</sup> Me bakukãmãre Abraãodjwý ne

“tu amim Metĩndjwýnh markumrêx nhy m arým tu kum axwe kê t jarê.”

<sup>7</sup> Kam, me kute tu amim Kritu markumrêx, me ja kunĩ kute mrãmri ne Abraão tãmdjwý pyrãk. Tãm dja gar ama.

<sup>8</sup> Amrêbê: ne Metĩndjwýnh amim,

“Dja me bajtem tu amim Kritu markumrêx ba kam tu memã axwe kê t jarê nhy m me arým axwe kê t.”

Nãm ã amim anen kam kãj bê Abraãomã tãm jarê. Nhy m me arým 'ã pi'õk no'õk ne. Mrãmri ne me kute tu amim Kritu markumrêx nhy m kute tu memã axwe kê t jarênh. Ja 'ã ne Abraãomã kum,

“Ga tu amim ikamnhĩxkumrêx. Ba kam arým imã akaprĩ. Dja atãmdjwý akõt tu amim imarkumrêx. Ba kam arým imã me kaprĩ. Dja apýnh me ba djãkam me bajtemdjwý akõt tu amim imarkumrêx. Ba kam arým imã me adjwýnhdjwý kaprĩ”, ane.

<sup>9</sup> Ga, me kute tu amim Kritu markumrêxja Metĩndjwýnh arým kum me kaprĩja pumũ. Abraão tu amim kamnhĩxkumrêx nhy m me kute kõt tu amim markumrêxja Metĩndjwýnh arým kum me kaprĩ.

<sup>10</sup> Be, me kute amim,

—Dja ba Môjdjê kukràdjà man kôt ar amijo iban arým ijaxwe kêt, anhyro baja. Me ja kunĩ'ã ne Metĩndjwýnh arým amim,

—Me wã dja ba me kanga nhym me arým me biknor tokry djakam akuno, ane. Mýkam dja me kanga? Bir, amrêbê Metĩndjwýnh me bakukãmãremã kum,

“Ga, Môjdjê kukràdjà'ã pi'òk no'òkja pumũ. Godja me mar kêt ne katàt kunĩ:kôt amijo ba kêt jabej ba dja ba pãnh me kanga nhym me arým me biknor tokry djakam akuno.”

Nãm Metĩndjwýnh ã me bakukãmãremã ane. Me bit kute kukràdjà kunĩkôt amijo baja, djãm kôt me axwe kêt mã? Kati. Nãm me te kute kukràdjà kunĩkôt amijo ba ne kam axwe rã'ã. Kam Metĩndjwýnh ta kabênkôt dja me ja kunĩ akuno. <sup>11</sup> Nhym kam me ajte me bakukãmãremã kum,

“Metĩndjwýnh kute memã axwe kêt jarênh nhym me arým kum mexja dja me tu amikajmã'ã markumrêx ne arým tĩn ne ar ba”, ane.

Ga, Metĩndjwýnh kute memã axwe kêt jarênhja pumũ. Me kute tu amim markumrêx kambit ne kute memã axwe kêt jarênh. Kam me kute Môjdjê kukràdjà marn kôt amijo baja te: axwe kêt prãmje. <sup>12</sup> Nhym kam ajte pi'òkkam memã kum,

“Me kute Môjdjê kukràdjà marn kôt amijo baja gê me prĩne kunĩkôt amijo ba mex”, ane.

Djãm pi'òkkam kabên jakam ne memã, me kute tu amim Metĩndjwýnh markumrêx jarê? Kati. Kute arênh kêt kumrêx. Nãm memã, kôt me kute amijo babit jarê.

<sup>13</sup> Nhym be, Metĩndjwýnh ne memã Kritu jarê. Kritu arým pĩte'y'ã gwaj bajaxweo pãnh. Amrêbê ne Metĩndjwýnh memã kum,

—Godja me Môjdjê kukràdjà mar kêt ne katàt kukràdjà kunĩ: kôt amijo ba kêt, ba dja ba pãnh me kanga nhym

me arým me biknor tokry djàkam akuno, ane. Tām ne Metīndjwýnh amrêbê arê. Kam gwaj ba ne gwaj kôt amijo baba kêt ne bajaxwe:. Ga, gwaj bajaxwe pānh Metīndjwýnh bit kute gwaj bakangaja pumū.

Nhym be, kati. Jakam Kritu arým gwaj bajaxweo pānh. Gwaj bakadjy ne Kritu ta mǎn axwe djwýnh pyrāk ne pīte'ykam wajêt. Nhym kam Metīndjwýnh arým kute kanga pyrāk nhym me biknor tokry djàkam biknor pyrāk. Nām ā anen pīte'ykam wajêt ne arým gwaj bajaxweo pānh. Amrêbê: ne Mōjdjê me bakukāmāremā kum,

“Me pī'ā me anhô nhym me arij. Nhym kam Metīndjwýnh arým me kanga nhym me arým me biknor tokry djàkam akuno”, ane.

Ga, Kritu pīte'ykam jêtkam Metīndjwýnh kute kanga pyrākja pumū.

<sup>14</sup> Kam, Jeju Kritu arým gwaj bajaxweo pānh. Nhym kam Metīndjwýnh arým me bajtemo djuw mex ne arým memā axwe kêt jarê. Tām ne Abraōmā arê. Gwaj tu amim Kritu markumrêx, nhym Metīndjwýnh Karō arým gwaj bawýr bôx. Amrêbê kute gwaj bamā Karō jarênhja arým gwaj bawýr bôx. Ja kadjy ne Kritu gwaj bajaxweo pānh.

*Metīndjwýnh ne Abraōmā kabēn pýnh ne arê.*

*Idja 6.13*

<sup>15</sup> Akmere, àpnhīre ar, ba ar amā pykakam me kukràdjà'ō jarê gar ama. Godja me'ō ar tu abenmā mýjja'ō jarênhkumrêx. Nhym me rūnh arým 'ā pi'ôk no'ôkkumrêx. Djām kam ajte me'ō kute ijukri kabēn 'ō jarênhmā? Nār, djām kam kute kabēn 'ōo bingrānhmā? Arkati. Arým ne me tu 'ā pi'ôk no'ôk māmđji. <sup>16</sup> Abraōmā ne Metīndjwýnh apýnh mýjja jarēn kam kum kabēn pýnh ne arēn kum,

—Dja ba ajo djuw mex ne atàm djwò djuw mex, ane. Djãm kute kabên jao bingràn hmã? Kati. Djãm tàm djwý krãptĩ'ã ne kum, “Dja ba atàm djwò djuw mex”, ane? Kati. Tàm djwý pydji'ã ne kum arê. Tàm djwý ja ne kubê Kritu.

<sup>17</sup> Metĩndjwýnh ne amrêbê: tu Abraãomã tàm djwýbê Krituja jarênhkumrêx. Nhyam kam tũ:mràm, arým kute kum arênh'ã amexbê 430 apêxkam Môjdjêmã kukràdjã jarê. Djã ne kute Môjdjêmã me kukràdjã jarênh kabên tũm japa? Djã ne kute amrêbê: Abraãomã tàm djwýbê Kritu jarênhja arým arênh kajgo? Arkati. Kute amrêbê: Abraãomã arênh kute mar tỳx rá'ã ne.

<sup>18</sup> Djã ne me kute Môjdjê kukràdjã marn kôt amijo bakam axwe kêt ne ajte kute amim Kritu markam axwe kêt? Kati. Nhyam be, arým ne Metĩndjwýnh mrãmri tu Abraãomã tàm djwý Kritu jarênhkumrêx nhyam amim tu markumrêx nhyam arým kum axwe kêt jarê.

<sup>19-20</sup> Nhyam be, mỳj kadjy ne Metĩndjwýnh Môjdjêmã kukràdjã jarê? Bir, me kute amijaxwe mar ne kute kôt amim kator kadjy. Ja kadjy ne Môjdjêmã kukràdjã jarê. Me aben djô'ã abenmã arênh mō: Abenmã arênh mōr tãmtã arým tũmràm Abraão tàm djwý Kritu'ỳr o bôx. Me bakamingrãnyrekam Kritu arým katon ar ba. Nhyam kam me tu amim markumrêx nhyam Metĩndjwýnh arým memã axwe kêt jarê. Metĩndjwýnh ne Môjdjêmã kukràdjã jarê. Kadjy mrãnh djwýnh kumrêxmã ne arê nhyam arým amũ Môjdjêmã arê nhyam amũ memã arê. Nhyam kam me krãptĩ amipãnh Môjdjêmã amijarê nhyam amũ Metĩndjwýnhmã me arê. Nhyam be, djã nãm Metĩndjwýnh me'ômã Kritu jarê nhyam arým amũ Abraãomã arê? Kati. Metĩndjwýnh pydji ne tu Abraão kuka kônh djan kum tàm djwýbê Kritu jarê.

<sup>21</sup> Metĩndjwýnh ne Abraãomã apýnh mỳjja mex jarênh kum tàm djwýbê Kritukôt axwe kêt jarê. Djã ne kam

amikabën jao aknon kam memã kum,

—Dja ga me Môjdjê kukràdjà man kôt ar amijo aba. Ba kam arým me amã axwe kêt jarê, ane? Kati. Dja me Môjdjê kukràdjà man kôt ar amijo ban arým te axwe kêt prãmje ne Metĩndjwýnhkôt tĩn ne ar ba kêt. Ne ren me Môjdjê kukràdjà'õ man kôt ar amijo ban ren kam axwe kêt ne ren kam Metĩndjwýnh kôt tĩn ne ar ba nhym Metĩndjwýnh ren kam memã kum,

—Dja ga me Môjdjê kukràdjà man kôt ar amijo aban kam ajaxwe kêt, ane.

<sup>22</sup> Nhym be, kati. Me'õ ta te axwe kêt prãmje. Metĩndjwýnh ne pi'õkkam me kunĩ kupãnhã memã axwe jarê. Mýj kadjy ne me kunĩmã axwe jarê? Bir, me kute tu amim Jeju Kritu markumrêx kadjy. Dja me tu amim markumrêx nhym Metĩndjwýnh arým memã axwe kêt jarê. Tãm ne amrêbê: me bakukãmãremã arênh pydji.

<sup>23</sup> Nhym be, amrêbê me bakukãmãre kute tu amim Kritu markumrêx kêtri ne me Môjdjê kukràdjàkôt ar amijo ba. Me ta te: katormã ar amijo ba. Me kute mrãmri ne mebê ijêkam me ta te: katormã amijo ba pyrãk. Gwaj badjwý te bakatormã ari amijo baba. Nhym kam tũmrãm me arým gwaj bamã Kritu'ã ajarê, gwaj arým tu amim markumrêx ne arým bakato. Bakaton arým gwaj ba ar baban bakĩnhkumrêx.

<sup>24</sup> Kam, Môjdjê kukràdjà ne kute me kra prĩre pumũnh djwýnh pyrãk. Me bakukãmãre ne me kute me kra prĩre pyrãk. Ne kam me omũnh djwýnh kôt ar amijo ba, Môjdjê kukràdjà kôt ar amijo ba nhym mebê tỳ:xi. Me kute aben djô'ã kôt amijo ba tãmtã nhym kam tũmrãm arým Kritu me'ýr bõx. Gwaj bawýr bõx gwaj arým tu amim markumrêx nhym arým tu gwaj bamã axwe kêt jarê.

<sup>25</sup> Gwaj arým tu amim Kritu markumrêx. Djãm kam gwaj baje akubyn Môjdjê kukràdjà'ýr amijo akêx prãm? Kati.

Arÿm me abatànhkam djãm akubyn kute amipumũnh djwÿnh prãm? Kati. Gwaj badjwÿ ne gwaj akubyn baje Môjdjê kukràdjà mar prãm kêt. Kritu ne gwaj tu amim markumrêx.

*Mebê Metĩndjwÿnh kra'ã ujarênh.*

*Dju r 1.12; Rô 8.14; Ep 1.5*

<sup>26</sup>Ar akunĩ ne gar arÿm abê Metĩndjwÿnh kra. Gar arÿm tu amim Kritu markumrêx ne arÿm abê Metĩndjwÿnh kra. <sup>27</sup>Me kute ngômã ar ajadjàr kunĩja, mÿj'ã ne ngômã ar ajadjàrja amijakre? Bir, Kritumê ne gar atypdji. 'Ã ne amijakre. Gar kam arÿm aje Kritu pyræk. Kritubê Metĩndjwÿnh Kra. Ar gadjwÿ ne gar Kritu kôt abê Metĩndjwÿnh kra.

<sup>28</sup>Djãm kam dja gar ajõ aben mÿr jabej memã kum, “Ibê idjaer”, ane? Nàr, “Ibê me bajtembê kregu”, ane? Nàr, gar ajõ aben mÿr jabej memã kum,

—Nãm me ipa 'amÿ ba me kabênkôt kajgo ari idjàpênh tÿxo iban idjumar punu, ane? Nàr,

—Me kute ipa 'amÿnh kêt ba arek mekôt ar iban idjumar mex, ane? Nàr gar ajõ aben mÿr jabej memã kum, “Imy”, ane, nàr, “Ini”, ane? Djãm aje amim Kritu markam aje aben mÿr jabej ã abenmã anhÿro abamã? Kati. Ar aje amim Kritu markam ne ar akunĩ abeno anhõbikwan apydji:i. <sup>29</sup>Ne, ar abê Kritu nhõbikwakam Metĩndjwÿnh arÿm ar ajo Abraão tàmdjwÿ. Kute ar anhingêt Abraomã kabên pÿnh ne arênhja kunĩ ne ajte ar amãdjwÿ arê. Dja gar arÿm Abãm nhõ mÿjjao aminhõ. Metĩndjwÿnh nhõ mÿjjao aminhõ.

## 4

*Metĩndjwÿnh gwaj bajo kra.*



<sup>1</sup> Jakam ne ba ar amã arẽ, me abê Garaxakam me jamã arẽ, gar ama. Me kra prĩre ne me kute bãm nhõ nêkrêx kunĩo bamã te o ane. Prĩrekam kute o ba kêt rã'ã. Nãm me kute bãm nhõ àpênh kajgo pyræk ne kajgo: ne. <sup>2</sup> Nhyam kam me omũnh djwýnh me prĩre jamã mrãnh mex'ã karõn me omũnho ba nhyam me kam kôt amijo ba. Nãm me prĩre pumũnh djwýnh meo ba: nhyam me arým abatãnh ne. Nhyam me bãm kute õ akati jarênhja arým bõx nhyam kam me arým bãm nhõ nêkrêxo aminhõn o ba.

<sup>3</sup> Gwaj badjwý Kritu bõx kêttri ne gwaj baje me prĩre pyræk. Gwaj baje me àpênh kajgo pyræk ne gwaj bakajgo: ar baba. Nhyam me kute gwaj bamã pykakam me kukràdjã jarênh gwaj ajbit maro baba. Kute mrãmri ne me prĩre pumũnh djwýnh me prĩremã mrãnh mex'ã karõo ba nhyam me kute kôt amijo baja pyræk. Gwaj badjwý gwaj pykakam me kukràdjãkôtbit amijo baba.

<sup>4</sup> Nhyam be, kam arým õ akati bõx nhyam Metĩndjwýnh arým pykamã Kra jano nhyam me'õ nire kurũm kato. Katon arým Mõjdjê kukràdjã man kôt ar amijo ba. <sup>5</sup> Mýj kadjy ne Mõjdjê kukràdjã man kôt ar amijo ba? Bir, kute gwaj bajaxweo pãnh kadjy. Gwaj te Mõjdjê kukràdjãkôtbit amijo baban mã bajaxwe:. Nhyam Kra arým gwaj bajaxweo pãnh nhyam kam Metĩndjwýnh arým gwaj bajo kra. Ja kadjy ne Kra arým ruw ne Mõjdjê kukràdjã man kôt ar amijo ba.

<sup>6</sup> Kute gwaj bajo krakam ne arým gwaj bamã Kra Karõ jano nhyam arým gwaj bakam nhýn gwaj bajo ba. Gwaj kam amikam Karõ ma nhyam arým gwaj bakadjwýnhbê Metĩndjwýnhmã kum, “Aba, Aba”, anhýro nhý. Me kabên djwýnhkam kum, “Aba, Aba”, anhýro nhý. Me bakabênkam ne Karõ ren arên ren kum, “Djünwã, Djünwã”, anhýro nhý. <sup>7</sup> Ga, me kute me pa 'amýnh nhyam me memã àpênh kajgo ar baja pumũ. Amrêbê ar gadjwý

ne gar Môj djê kukràdjà man kôt amijo aba kajgo. Ne jakam arým Môj djê kukràdjà kôt amijo aba kêt. Kritu ar akadju ty nhym Metĩndjwýnh kute ar ajo krakam. Dja ar amã õ mýjja ngã gar o aba.

*Me kute akubyn me kukràdjào ba prãm.*

*A Kô 11.3; Kor 2.16; Ped k 1.14*

<sup>8</sup> Be, ar abê me bajtem ne gar amrêbê ar aje Metĩndjwýnhkumrêx mar kêt ne kôt amijo aba kêt. Apýnh mýjjaõ metĩndjwýnh karõ nhipejamã ne gar adjapênh týx kajgoõ aba. Djãm mrãmri ne kubê Metĩndjwýnhkumrêx? Arkati. Gar o aban aje mrãmri ne me pa 'amýnh nhym me memã àpênh týx kajgoõ ba ne te apôx prãmje ja pyræk.

<sup>9</sup> Nhym be, jakam ne gar arým aje Metĩndjwýnhkumrêx mar. Djãm ar ga ne gar amim mar? Kati. Ta kumrêx ne kute ar amarn arým ar amã amijo amirĩt gar kam kôt arým amim maro aba. Arým ar aje Metĩndjwýnhkumrêx mar jakam mýkam ne aje akubyn me kum Metĩndjwýnh kính kêtja kukràdjà marn kôt amijo aba prãm? Gar me kukràdjà kôt ar amijo aban te ajaxwe kêt prãmje. Kam ar arekre. Me kukràdjà kajgo. Dja gar kôt ar amijo aban arým aje mrãmri ne me pa 'amýnh nhym me memã àpênh kajgoõ ba pyræk.

<sup>10</sup> Ar aje mýjjaõ kajgo kadju adjapênh týx prãm kam ne gar apýnh akati krãptĩkam me kukràdjà man arým abenmã kum,

—Akati ja dja gwaj 'ã bano týx ne Môj djê kukràdjà kôt bamex, anen ajte apýnh mytyrwý'ã abenmã kum,

—Mytyrwý ja dja gwaj 'ã bano týx ne me kukràdjà kôt bamex, anen ajte abenmã kum,

—Dja gwaj bãygogo djê pan ajte Môj djê kôt akati ja ma, anen ajte abenmã kum,

—Dja gwaj amex ja'ã bano tỳx ne Môjdjê kukràdjà kôt bamex, ane. Dji:jàk. Djãm me kukràdjà kajgoja krãre got? Djãm ar aje ã amijo anhỳrkam Metĩndjwỳnh kute ar amã ajaxwe kêt jarẽn h gar kum amex got? <sup>11</sup> Amrêbê ba me abê Garaxakam Kritu jarẽn ho iban idjàpênh kume:x. Ar akam idjàpênh kajgo gar aje Kritu mar kajgo karõ ne ba ar ajã idjàpnhĩx ne axwe idjumar ne.

<sup>12</sup> Akmere, àpnhĩre ar, on ar ikudjwa. Ba ne ba ije ar apyràk. Djãm ba ne gar ijo ajkê, ba ar amã ikabên? Kati. <sup>13</sup> Nhym be, amrêbê ije ar amã Kritu'ã ujarẽn ny jarẽn kutewa. Kamã ne ba ikanên ar amã Kritu'ã ajarê gar ama. <sup>14</sup> Nãm itokry te ijo ba djãm kam ne gar amã ikurên ikanga? Kati. Nã gãm ar prĩne imar mex. Nã gãm ar ijo Metĩndjwỳnh kadjy mrãnh djwỳnh pyràk nàr ijo Kritu Jeju pyràk ne ar amã ikĩ:nh ne. <sup>15</sup> Ba ino kanê: gar te aje ikadjy ano kadjàr ne pãnh imã ano jadjàr ba ikanê kêt mã. Ba ne ba 'ã ar apumũn arỳm ar amã arê. Ar amã ikĩnh. Mỳj ne gar arỳm jakam amijon? <sup>16</sup> Djãm ije katàt ar amã Metĩndjwỳnh kabên jarẽn hkam gar arỳm ijo akurê djwỳnh?

<sup>17</sup> Be, wãkam me'õ ar kute amiwỳr ar ajo akêxmã àpênh kume:xo ba. Djãm me kute ar ajo mex kadjy? Kati. Me kute ar abê ikurê mã. Dja me ar abê ikurê gar kam arỳm mekôt ar amijo aban arỳm me kukràdjà'ã ano tỳx ne ar o aba. Ja kadjy ne me ar abê ar ikurêo ba.

<sup>18</sup> Ne ren me kute ar ajo mexmã àpênh kumex ne ren kam mrãmri mexkumrêx. Ar akam idjãm kam ne me ren ar ajo mexmã àpênh kumex ne ren ajbubê itỳmkamdjwỳ ren ar ajo mexmã àpênh kumex ne kam ren mrãmri mexkumrêx. Nhym be, kati. Me kute ar abê ikurê kadjy ne me àpênh kumex.

<sup>19</sup> Ba ne ba imã ar ajabê:ê kute mrãmri ne me kum kra prĩre jabêja pyràk. Ije me'õ nire kra àkam umar punure

pyràk ne ar akam idjumar punu:re. Me'õja amijo 'êx ne Kritu kupa'ã ar amã arẽ ba ar ama:ro iba. Nok gar ren kabẽn man Kritu kupa'ã amijo tẽ. Ga, me prĩre kute nã tikkrekam aminhipêxo baja pumũ. Nãm aminhipêxo ba:n arỳm prĩne aminhipêx nhinomã kumẽ. Ar gadjwỳ. Dja gar prĩne Kritu kõt amexo amũ amikamẽnho tẽ. Amikamẽnho tẽ:n kam arỳm prĩne Kritu mexo amex. Tãm ne ba imã kĩnh. Nã bãm ar ama:ro iba. <sup>20</sup> Ar awỳr ibõx prãmkam ne ba dja. Ne ba ren inhýtã ar awỳr bõx. Djã ne ba ren kam ar amã ibẽn tỳx? Kati. Kam ne ba ren ar amã ibẽn rerekbito ikabẽn. Nhym be, kati. Amybỳm ne ba axwe ar akam idjumar ne.

*Agaremẽ Xara'ã ujarẽn.*

<sup>21</sup> Dja gar jakam imã arẽ. Ar aje Mõjdjẽ kukràdjã marn kõt amijo aba prãmja mỳkam ne gar amikadjy kukràdjã kunĩ mar kêt? <sup>22</sup> Ba ar amã kukràdjã jarẽ gar ama. Mõjdjẽ ne kute 'ã pi'òk no'òkkam memã Abraão kra amãnhkrut'ã ajarẽ. Kra ja ne Abraão õ àpẽn kajgobê Agaremã kudji. Agare ne kubê me pardja. Nãm Abraãomã àpẽn kajgobit ar ban umar punure. Õ àpẽn kajo jamã ne kra ja dji. Nhym be, prõ djwỳnhbê Xaramã ne kra djwỳnhja dji. Prõ ja ne kubê me pardja kêt ne ta arek mekõt ar ban umar mex.

<sup>23</sup> Nhym kam Abraão ta ne Xara kute kum arẽnhkõt me pardjajamã kra ja dji nhym kumrẽx ruw. Nhym be prõ djwỳnhmã kute kra djwỳnh djirja ne Metĩndjwỳnh kabẽnkõt. Metĩndjwỳnh ta kute kum kra jarẽn kõt ne Abraão arỳm prõbê Xaramã kudji. Kute kum, “Dja akra'õ amirĩt”, anhỳr kõt arỳm kum kudji. Xara kubê me pardja kêt ne ta arek mekõt ar ban umar mexkumrẽxjamã ne kudji nhym kam ruw.

<sup>24</sup> Mỳkam ne ba ar amã ar nire abenkôt kra rwỳkja'ã ajarẽ? Mỳj'ã ne ar nireja amijakre? Bir, ar amãnhkrut Metĩndjwỳnh kabẽn amãnhkrut'ã amijakre.

Ba ar amã kabẽn jarẽ gar ama. Metĩndjwỳnh kute Abraõomã kabẽn jarẽnhkam ne kum Kritu jarẽ. Kritu'ã ne Xara amijakre. Nhym be, Mõjdjê kukràdjà'ã ne Agare amijakre. Be, kabẽn amãnhkrut ne ja. 'Ã ne ar nire amãnhkrut amijakre. Metĩndjwỳnh ne krãnhbê Xinajkam Mõjdjêmã me kukràdjaja jarẽ. Me kukràdjaja kôt ne me àpênh tỳx kajgobit ar ban te axwe kêt prãmje. Krãnhbê Xinaj'ã ne Agare amijakre. Agare ne kubê me pardja ne Abraõomã àpênh tỳx kajgobit ar ba. <sup>25</sup> Agare'ã ne krãnhbê Xinaj amijakre. Pykabê Arabijkam ne krãnhbê Xinaj. Nhym kam Xinaj'ã ne pykakam krĩraxbê Djeruxarēja amijakre. Djeruxarẽ jakam me ar ba ne me kute Mõjdjê kukràdjàbit mar. Me kute Mõjdjê kukràdjàbit mar ne me àpênh tỳx kajgobit ar ban te axwe kêt prãmje.

<sup>26</sup> Nhym be, me kute amim Kritu mar ne me kàjkwakam Djeruxarèkam ar ba. Me ja ne me kute Mõjdjê kukràdjà marn kute kôt amijo baja kangan Kritubit kôt ar amijo ba. Kôt ar amijo ban kubê me pardja kêt ne ta arỳm arek mekôt ar ban umar mex ne. Kàjkwakam Djeruxarẽ ne kute me banã pyræk.

<sup>27</sup> Ga, Metĩndjwỳnh amrêbê: kute me bakukãmãremã kabẽn jarẽnh nhym me arỳm kute 'ã pi'òk no'òkja pumũ. Nãm Metĩndjwỳnh tu krĩraxbê Djeruxarêmã kabẽn jarẽ. Nãm tu kum,

“Ga te akra prãmje ne akra kêtikumrêxja on akĩnh. Aje akra à mar kêtja on tu adjàmra tỳx kaba.

Djãm mrãmri akra kêt ne ar abamã, amjên kute akan-gakam akra kêt ne ar abamã? Kati. Dja me arỳm mjênja te akuràm kra krãptĩ ga dja ga akra krãptĩo me akrenh mex ne.”

Nãm ã kàjkwakam krĩraxbê Djeruxarêjamã ane. Ga, kàjkwakam krĩraxbê Djeruxarê kute mrãmri ne gwaj bakunĩ nã pyrækja pumũ. Arỳm gwaj bakràptĩn tu amim Kritu markumrêx nhym Metĩndjwỳnh arỳm tu gwaj bamã axwe kêt jarê.

<sup>28</sup> Ga, Metĩndjwỳnh kute Abraõomã kum, “Dja akra amirĩt”, anhỳrja pumũ. Nhym kam kute kum arênh kôt arỳm Idjak kato. Ar gadjwỳ ne gar aje Idjak pyræk. Mỳkam? Bir, Metĩndjwỳnh ne ar amã,

—Dja gar tu amim Kritu markumrêx. Ba kam arỳm ar amã axwe kêt jarên arỳm ar ajo ikra, ane. Gar kam arỳm tu amim markumrêx nhym kute ar amã arênh kôt arỳm ar ajo kra. Kute Abraõomã arênh kôt ne arỳm kra Idjak kato. Ar gadjwỳ kute ar amã arênh kôt ne arỳm ar amã axwe kêt jarên arỳm ar ajo kra.

<sup>29</sup> Nhym be, amrêbê: Imaêr kum Idjak kurêo ba. Metĩndjwỳnh Karõ kabên kôt ne Abraõo arỳm kra Idjak dji nhym katon ar ba nhym Imaêr kum kurêo ba. Abraõo ta ne Imaêr dji nhym arỳm kum kamybê Idjak kurêo ba. Nãm ã akati jakam me kum gwaj bakurêo ane. Me kute amim,

—Dja ba Mõjdjê kukràdjà man kôt ar amijo iban arỳm ijaxwe kêt, anhỳro baja. Me ja ne me kum gwaj bakurê. Kum gwaj baje amim Kritu marja kurêo ba. Gwaj baje amim Kritu mar ne gwaj amim,

—Dja ba tu amim Kritu markumrêx nhym Metĩndjwỳnh arỳm imã ijaxwe kêt jarê, anhỳro baba. Gwaj anhỳro baba nhym me arỳm kum gwaj bakurêo ba.

<sup>30</sup> Nhym kam mỳj ne amrêbê: me bakukãmãre arê nhym me'ã pi'ôk no'ôk ne? Bir, Xarabê me pardja kêtja ne Agare'ã Abraõomã kabên ne kum,

“Djãm gu banhõ àpênh kajgo kraja kute ikra kôt anhõ mỳjjao aminhõmã? Amỳrbê kute o aminhõmã?

Kati. Ikrabit dja anhõ mỳjjao aminhõ. On ikra nêje bõm  
Agaremẽ kra ar amẽ.”

Nãm ã Xara Abraãomã ane. <sup>31</sup> Ar tãm 'ã dja gwaj amijakren  
amima. Me kute amim,

—Ba Mõjdjê kukràdjà man kõt ar amijo iban ijaxwe kêt,  
anhÿrja ne me te axwe kêt prãmje. Nãm me me pardja  
kra'ã amijakre ne àpênh kajgo ar ba. Dja me Metĩndjwỳnh  
nhõ mỳjjao aminhõ kêt ne axwe rã'ã. Nhym be, gwaj ba  
ne gwaj tu amim Kritu markumrẽx nhym Metĩndjwỳnh  
arỳm tu gwaj bamã axwe kêt jarẽ gwaj arỳm kum bajaxwe  
kêt. Gwaj ba ne gwaj me pardja kêt kra'ã amijakre ne kam  
Metĩndjwỳnh nhõ mỳjjao aminhõ.

## 5

*Pykakam me kute kukràdjà kajgo kõt amijo ba nêje me akre.  
Rõ 3.21; Kor 2.20*

<sup>1</sup> Gwaj ba: arek mekõt ar baban badjumar mex kadjy ne  
Kritu arỳm gwaj bapytà. Ga, mryti kute jênh pytĩ tur ne  
kute o baja pumũ. Gwaj badjwỳ amrêbê: gwaj pykakam  
me kukràdjà kõt badjàpênh tỳx kajgobit ar baba. Kam ne  
gwaj badjumar punu:re. Nhym Kritu arỳm gwaj bapytà  
gwaj arỳm me kukràdjà kõt badjàpênh kêt. Gwaj ba ne  
gwaj Kritukõt arek ar baban badjumar mex. Arỳm Kritu  
kõt badjumar mexkam kwārĩk wānh Mõjdjê kukràdjà'ỳr  
amijo akẽx kêt ne kõt amijo aba kêt. Dja ga kõt ar amijo  
aban arỳm akapri:re kute mrãmri ne mry jênh pytĩkam  
kapri pyræk. Gê me te: kukràdjà'ã ar amã karõ gar arek  
mebê dja. Kritu kõt dja gar adjãm tỳx.

<sup>2</sup> Ba ibê Paur ne ba me abê Garaxamã arẽ. Godja gar aje  
memã kum,

—Ajrã. Mõjdjê kukràdjà kõt imy nhinhu kà krãta. Dja  
ba kõt ijaxwe kêt, anhÿr jabej nhym me amy kà nhinhu  
krãta gar kam arỳm aje Kritu mar kajgo. <sup>3</sup> Ba ajte mrãmri

me kunĩmã arẽnhkumrẽx. Metĩndjwỳnh ne arỳm me my kà rẽnhjamã kute prĩne Mõjdjê kukràdjà kunĩ kõt amijo bamã memã arẽ.

<sup>4</sup> Ar ajõ ar aje amim,

—Ba Mõjdjê kukràdjà man kõt ar amijo iban arỳm ijaxwe kêt, anhỹr. Ar aje amim anhỹrkam aje Kritu mar kajgo. Nhym kam Metĩndjwỳnh kum ar akapĩ kêt ne arỳm ar amã axwe jarẽ. Ar ga ne gar Kritu bê amijo akẽx.

<sup>5</sup> Nhym be, gwaj ba ne gwaj arỳm tu amim Kritu markumrẽx. Nhym kam Metĩndjwỳnh arỳm Karõ kõt gwaj bajo mex. Dja Karõ gwaj bajo ban arỳm gwaj bajo mex gwaj kam bakunĩ bajaxwe kêt. Tãm ne gwaj tu amiwỳr kamnhĩxkumrẽx. <sup>6</sup> Be, Kritu kõt gwaj baje amijo babakam djãm Metĩndjwỳnh kute gwaj bamy kà rẽnh mar? Nàr djãm kute gwaj bamy kà tã mar? Kati. Ja ne kum kajgokumrẽx. Nhym be, gwaj baje tu amim Kritu markumrẽxkam. Kambit ne gwaj mrãmri kum bakajgo kêtumrẽx ne kum bajaxwe kêt. Ne baje tu amim markumrẽxkam arỳm bamã me abêkumrẽx.

<sup>7</sup> Amrêbê ne gar aje mrãmri ne me rer djwỳnh prõt mex pyræk. Ne katàt Kritu kõt ar amijo aban 'ã adjukanga kêtumrẽx. Mỳj me'õ ne ar abê aptà? Gar kabẽn katàt man kõt ar amijo aba nhym ar abê aptà? <sup>8</sup> Djãm Metĩndjwỳnh kute amiwỳr ar ajwỳr djwỳnh ta ne ar abê aptà? Djãm ta ne Mõjdjê kukràdjà'ã ar amã karõn o ar abê aptà? Kati. Atemã me'õ.

<sup>9</sup> Ga, me kute djwỳkam igot djà kryre rẽnhja pumũ. Nhym kam arỳm djwỳ djôm mẽ amrà. Ar gadjwỳ ne me ngrêre ar amã 'ã karõo dja. Dja me arek ar amã 'ã karõo dja: nhym me kabẽn ar anhĩ kunĩ mẽ amràn arỳm me'y'r ar ajo akẽx gar arỳm mekõt ar amijo aba. <sup>10</sup> Nhym be, arỳm ne gar aje ikabẽn ja markam ba tu amim ar akamnhĩxkumrẽx ne amim,



—Kati. Jakam dja ar ikabên man Kritu kôtbít amijo ba, ane. Nhyim be, me'õ ja kute Môj djê kukràdjà'ã ar amã karõn ar amã kaprĩ jadjàrja gêdja Metĩndjwỳnh arỳm kum axwe pãnh jarẽ.

<sup>11</sup> Nhyim me we ar amã,

—Paurdjwỳ ne me my kà rênh'ã memã àpnênho ba, anhỹro ba. Djãm mrãmri me kabên? Kati. Ba ne ba kàj bê memã kum,

—Kritu ne pĩte'ykam ty. Dja ga me tu amim markumrêx, nhyim Metĩndjwỳnh arỳm tu me amã axwe kêt jarẽ ga me kum ajaxwe kêt, anhỹro iba. Ne ba ren iby ajte memã kum,

—Gê me me amy kà rênh gê kam arỳm Metĩndjwỳnh me amã axwe kêt jarẽ, anhỹro iba nhyim ren me kum ikurê kêt. Nhyim be, kati. Nã bãm memã kum,

—Kritu ne pĩte'ykam ty. Dja ga me tu amim markumrêx nhyim Metĩndjwỳnh arỳm tu me amã axwe kêt jarẽ, anhỹro iba. Jabit ne ba memã arẽ. Ne kam ije me my kà rênh'ã memã karõ kêt. Kam ne me arỳm ijo bikênho ba.

<sup>12</sup> Be, me kute ar amy kà rênh'ã ar amã karõn ar amã kaprĩ jadjàrja ren ta ã amijo bikênho ane.

*Me kute Metĩndjwỳnh Karõ mar'ã memã karõ.*

*Idja 13.3; Ped k 1.22; Dju k 3.11*

<sup>13</sup> Kam, akmere àpnhĩre ar, djãm ar aje Môj djê kukràdjà marn kôt amijo aban ar akaprĩmã ne Metĩndjwỳnh amiwỳr ar ajuw ne ar ajo ba? Kati. Ar adjumar mex ne arek mekôt ar abamã. Ja kadjy ne Metĩndjwỳnh amiwỳr ar ajo akêx. Ar aje Môj djê kukràdjà kôt amijo aba kêt ne arek mekôt ar abakam djãm kam arỳm tu ajaxwemã? Djãm aje amidjwỳnhbito kĩnh kadjy tu ajaxwemã? Kati. Kwãrik wãnh ajaxwe kêt. Arỳm aje Môj djê kukràdjà mar kêt ne arek mekôt ar abakam dja gar amã aben jabên abenmã apê.

<sup>14</sup> Mỳkam? Bir, Metĩndjwỳnh ne memã kum,

“Me amã amibu'ã me ja jabê. Kute mrãmri ne ga me amã amijabêja pyræk dja ga me ã amã amibu'ã me ja jabêo ane”, ane.

Dja gar Metĩndjwỳnh kabēnja pydjibit man kôt ar amijo aban arỳm Mòjdjê kukràdjà kunĩ man kôt amijo aba. Mrãmri ar amã me abêkam ne gar tu Metĩndjwỳnhmã amexkumrêx.

<sup>15</sup> Nàr kon dja gar amã aben kurêo aba mỳj dja kam akute? Ga, ropre kute aben kamjãnh ne kute abeno apêxo baja pumũ. Ar gadjwỳ dja gar amã aben kurê tãmtã ĩ arỳm aben bê akunĩ ajmã.

<sup>16</sup> Gwaj ba, bamã amidjwỳnhbito kĩnh prãm ne kôt arỳm bajaxwe prãm. Nhym be, dja gar amim Metĩndjwỳnh Karõ man mã kôt ar amijo aban kam arỳm kôt ajmã akute kêt ne katàt amijo aba.

<sup>17</sup> Djãm ar ga ne gar Metĩndjwỳnhmã ajaxwe kêt? Kati. Gwaj ba ne gwaj bajaxwe prãm ne amim, “Ba amidjwỳnhbito kĩnh”, anhỹro baba. Nhym kam Metĩndjwỳnh Karõ mã gwaj bamã,

—Kati. Kwãrik wãnh, anen ã akubyn gwaj banêo ane. Karõ mã akubyn gwaj banê gwaj ba bajaxwemã mã amim, “Ba amidjwỳnhbito kĩnh”, anhỹro baba. Gwaj mã bakabêno Metĩndjwỳnh Karõ japanho baba. Nhym ta mã akubyn gwaj banêo ba. Kam ar ga ne gar te ga: ajaxwe kêt prãmje.

<sup>18</sup> Nhym be, ar ga dja gar amim Metĩndjwỳnh Karõ man mã kôt ar amijo aba nhym kam ta arỳm katàt ar ajo ba. Dja gar amim Karõ maro aba:n arỳm amã Mòjdjê kukràdjà maro aba prãm kêtikumrêx.

*Me kute amidjwỳnhbito kĩnh prãm kam apỳnh axwe djàri 'ã ujarēnh ne ja.*

<sup>19</sup> Me kute amidjwýnhbito kǐnh prǎmkam ne me apýnh mýjjao ban kôt axwe. Me kute apýnh mýjjao baja ne me kunĩ kute mar.

Nām me mebê prōo akĩ, mjêno akĩ.

Ne ajte ari prō, mjên kupa'ã kurê ba.

Ne ajte kute abenbê me kupêho amijo àpnuo ba.

Ne ajte amijo àpnu me:x ne.

Me kute amidjwýnh kǐnh prǎmkam kute mýjjao ba ne ja.

<sup>20</sup> Ne ajte mýjjao metĩndjwýnh karō nhipêxmã amijarêho ba.

Ne ajte ta apýnh mýjja maro amiptàn arým amijo wajan-gao ba.

Ne ajte kum me kurêo ba.

Ne ajte axikôt kabên kêt ne abenã kabên ba.

Ne ajte me õ mýjja pro'ã ngryk ba.

Ne ajte kute amijã ngryk nê kêt ne tu ngryk ba.

Ne ajte kute amidjwýnhbit markam amijo rax pytàro ba.

Ne ajte kute amiwýr meo akêx prāmje aben bê me kurêo ba.

Ne ajte apýnh mýj kukràdjaja'ã no tỳx ne kam mýr jabej apýnh me kwỳ djari kôt bikprōnh ba.

Me kute amidjwýnhbito kǐnh prǎmkam kute mýjjao ba ne ja.

<sup>21</sup> Ne ajte te kute me uràk prāmje ngryk ba.

Ne ajte aben paro ba.

Ne ajte kadjwati kangôkam\* bibãnh ba.

Ne ajte apýnh mýjja punukam aben tỳx jabejo ba.

Be, apýnh mýjja kute ja pyràk rã'ã. Me kute

amidjwýnhbito kǐnh prǎmkam kute mýjjao ba ne ja.

Dja Metĩndjwýnh ĩ õ me ja kunĩo ba. Djām kam kute me

---

\* <sup>5:21</sup> Mýjja me kute o kōm ne kôt bibãnh kunĩja, kadjwati kangômê uba kangômê, mýjja kangô kunĩ ne me kum kadjwati kangô jarê.

jao bamã? Me kute mỳjja jao ba, djãm kute meo bamã? Kati. Dja me ja wãnh me biknor tokry djàkam akuno. Tãm ne ba amrêbê ar amã arên ajte jakam ar amã arê.

*Metĩndjwỳnh* Karõ kute meo bakam me kute amijo ba mex.

<sup>22</sup> Nhy m be, dja *Metĩndjwỳnh* Karõ ta ar ajo ba. Gar arỳm ô'ã amã me abê.

Ne ajte akĩnh tire.

Ne ajte adjumar mex.

Ne ajte memã ano kator kêt ne amijamãr 'iry.

Dja Karõ ta ar ajo ba gar ajte ô'ã memã aprĩ.

Ne ajte anhõdjãnh.

Ne ajte katãt *Metĩndjwỳnh* kabên man kôt ar amijo aban 'ã adjukanga kêt.

<sup>23</sup> Ne ajte akabôt katin ar aba.

Ne ajte amijaxwe kêt kadjy amijãno dja.

Dja Karõ ta ar ajo ba gar arỳm ã amijo anen kam *Metĩndjwỳnh* kôt amijo aba mexkumrêx nhy m arỳm ar akam kĩnhkumrêx ne ar amã ar akatãtkumrêx jarê.

<sup>24</sup> Kritu kute gwaj bajo aminhõkam gwaj arỳm bamã bajaxwe prãm kêt. Baje amidjwỳnhbito kĩnh kadjy bajaxwe prãm kêt. Baje mebê me kupênh prãm kêt ne bamã mỳjja punu prãm kêt. Baje mrãmri ne Kritumê ro'ã aktã banhikra, baparmo i'êk pyrãk. Gwaj ã amimaro ane.

<sup>25</sup> Mrãmri Karõ kute gwaj bajo ba jabej gwaj mã Karõ man prĩne kôt amijo baba mex. <sup>26</sup> Kwãrik wãnh gwaj bakajgokam arĩk amijo badjãmra ar baba kêt. Dja gwaj amijo badjãmra ar baba:n arỳm abenmã aben kurê'uko baba. Ne aben rax mỳr jabej aben kam bangryko baba.

## 6

*Me kum me kunĩ kaprĩ'ã kute memã karõ.*

<sup>1</sup> Akmere àpnhĩre ar, godja me'õ arým axwe nhym me arým kute kôt omũnh jabej. Ar ga aje amim Metĩndjwýnh Karõ maro abaja dja gar me'õmã aprĩren akubyn Metĩndjwýnh'ýr o akẽx. Ne amiman amim,

—Ý, watĩre. Nok ba ren akati 'õkam Metĩndjwýnh maro aknon ren ã kudjwa ijaxweo anhýr jabej, ane. Dja gar ã amimaro anen ajaxwe nêje amijãno djan arým me'õjamã aprĩren akubyn 'ýr o akẽx jabej.

<sup>2</sup> Ga, me kute jênh pytĩo baja pumũ. Nhym me arým 'ýr bõx ne arým kum kaprĩn kôt o kangõ. Ar gadjwý dja gar aben maro aba nhym me'õ amikam kaprĩre. Ar amã kaprĩn kum kaprĩ kwý ngri. Dja gar ã anen arým aje Kritu kukràdjã marn kôt amijo aba mexkumrẽx.

<sup>3</sup> Nhym be, godja ajõ katàt aje amijo aba kêt kam mã amim,

—Djãm ba ijaxwe? Kati. Ijaxwe'õ kêt kumrẽx, 'ityx, anhýro aba jabej. Djãm mrãmri ne akabẽn? Kati. Ga ne ga amim ajẽx ne aminoo abiknoro aba.

<sup>4</sup> Ar akunĩ apýnh anhĩ djãri gar mrãmri katàt aje amijo aba jabej ga: amikabi. Ne kam mrãmri katàt aje amijo abakam ga amikam akĩnh. Nhym be, djã ne aje amim,

—Ba ne ba ije katàt amijo ibao tãmwã jakrenh, anhýro abakam djãm mrãmri akatàt? Kati. Ar aje ã amim anhýro abakam akatàt kêt kumrẽx. <sup>5</sup> Nhym be, ar akunĩ apýnh anhĩ djãri dja gar goja mrãmri akatàtkumrẽx jabej katàt amijo aba.

<sup>6</sup> Be, dja Metĩndjwýnh kabẽn jarẽnh djwýnh ar amã kabẽn jarẽnho ku'ê, ar amikutã kum ar anhõ mýjja mex kwý ngã. Kum angã gẽ ar akôt o amikĩnh.

<sup>7</sup> Djãm me kute Metĩndjwýnh'ã abenmã kum,

—Djãm mrãmri dja Metĩndjwýnh memã axwe pãnh jarẽ? Kati. Kabẽn kajgo. Me àkĩnhĩkam pãnh kêt. Me 'êxnhĩkam pãnh kêt. Me axwe kunĩkam pãnh kêt, anhýr?

Djãm me kute anhÿrkam mrãmri me kabënkumrëx? Kati. Kwãrĩk wãnh amim ajêx ne aminoo abiknor kêt. Ga, mrÿnhĩ 'y, akrô 'y, akaôk 'y, 'ê 'ôdjwÿ 'yja pumũ. Djã ne ren me 'y ja kren ren kôt djwÿ mex jamÿ? Kati. Me kute 'y mexbit krekam kute kôt djwÿ mex jamÿnh.

<sup>8</sup> Gwaj badjwÿ. Godja gwaj amidjwÿnhbito kĩnh kadjy bajaxwe jabej, badjàkĩnhĩo baba jabej, bakabën punuo baba jabej. Metĩndjwÿnh dja pãnh gwaj bamã mÿjja punu ngã gwaj arÿm bakaprĩ:re. Dja gwaj baje me kute mrÿnhĩ 'y kren arÿm kaprĩ pyræk. Nàr, godja gwaj amim Metĩndjwÿnh Karõ man katàt kôt ar amijo baba, Metĩndjwÿnh Karõ dja arÿm gwaj bamã o pãnh. Pãnh dja gwaj arÿm kôt batĩn ne ar baba rã'ã: rã'ã ne.

<sup>9</sup> Kam dja gar adjukaprĩn katàt aje amijo aba'ã adjukanga kêt. Dja gar ã anen ĩ arÿm amim akĩnh djã byn akĩnhkumrëx. Kute mrãmri ne me kute bàygogo djê parkam me kĩnh pyræk. <sup>10</sup> Pykakam mekôt ar abari dja gar amã me kunĩ kaprĩ. Dja gar me kute amim Jeju marja kumrëx aman amã me kaprĩn kam amã me kunĩ kaprĩ.

*Metĩndjwÿnh kute meo nykambit kĩnh.*

<sup>11</sup> Ga, ba inhikrakam ije ar amã pi'ôk no'ôkkam ije no'ôk rÿnhja pumũ.

<sup>12</sup> Me ar amy kà rênh'ã ar amã àpnênho ba. Dja gar me kabën kôt ar amy kà rê nhym amũ me ja arÿm me'ã abenmã kum,

—Be, me Môjdjê kukràdjà'ã no tÿxkumrëx. Me mexkumrëx, ane. Ja kadjy ne me ar amy kà rênh'ã ar amã àpnê. Ne ren 'ã ar amã àpnênh kêt nhym ren me 'ã kum me kurêo ba. Nhym ren me Kritu pĩte'ykam jêtbit'ã ar amã ajarê nhym ren me 'ã kum me kurêo ba. Nhym be, kati. Nãm me ar amy kà rênh'ã ar amã àpnênho ba nhym me arÿm kum me kĩnh. <sup>13</sup> Djãm me arÿm my kà rênham

kute mrāmri Mōjdjê kukràdjà marn kôt amijo bakumrêx? Kati. Ne kam mỳj kadjy ne me ar amy kà rênh'ã ar amã apnê? Bir, dja me amiwỳr ar ajo akêx ne 'ã amidjwỳnhbito amran memã kum,

—Be, arỳm ar me bakukràdjà kôt ba mexkumrêx. Ba ne ba 'ỳr aro akêx, ane. Ja kadjy ne me ar amy kà rênh'ã ar amã àpnêho ba.

<sup>14</sup> Nhy m be, djã ne ba ba: amijo idjãmra prãm? Kati. Bēnjadjwỳr djwỳnhbê Jeju Kritu ne ba o idjãmra prãm. Kute gwaj bajaxweo pãnh kadjy ne arỳm pĩte'ykam ty. Tãm ne ba o amra. Pĩte'ykam tykkam Metĩndjwỳnh arỳm imã ijaxwe kêt jarê. Kam, me kum Metĩndjwỳnh kĩnh kêt kukràdjàja ba arỳm kanga. Ga, me arỳm tykkam kum mỳjja kĩnh kêtja pumũ. Badjwỳ imã me kukràdjà kĩnh kêt. Me kum Metĩndjwỳnh kĩnh kêt kukràdjàja imã kĩnh kêt. Ba Kritumẽ ro'ã pĩte'ykam arỳm ityk pyræk ne imã me kukràdjà kĩnh kêt.

<sup>15</sup> Be, arỳm gwaj baje tu amim Jeju Kritu markam djãm Metĩndjwỳnh kute gwaj bamy kà rênh mar nàr djãm kute gwaj bamy kà tã mar? Kati. Mỳjja ja ne arỳm kum kajgokumrêx. Nhy m be, gwaj arỳm tu amim markumrêx nhy m arỳm gwaj bajo ny ne. Tãm ne Metĩndjwỳnh kute markumrêx. <sup>16</sup> Me kute ikukràdjà jakôt amijo baja gê Metĩndjwỳnh kum me kaprĩ gê me umar mexkumrêx. Metĩndjwỳnh nhõ mebê idjaerkumrêxja gê kum me kaprĩ gê me umar mexkumrêx.

<sup>17</sup> Jakam dja gar aminhijukri amidjan ajõ ajte imã ikaprĩ jadjàr kêt. Kute mrāmri ne me kute Bēnjadjwỳr djwỳnh Jejuo bikēnhkam apỳnh kà rã kumex pyræk ne ikà rã kumex. Jejukôt ne ba ikà rã kumex. Kam kwãrik wãnh ajte imã ikaprĩ jadjàr kêt.

<sup>18</sup> Gê Běnjadjwỳr djwỳnhbê Jeju tu kum ar akaprĩ.\* Tãm ne ja.

---

\* 6:18 Djãm ar ga ne gar adjukaprĩ nhym pãnh arỳm kum ar akaprĩ Kati. Ta ne tu kum ar akaprĩkumrẽx.



## Metĩndjwỳnh Kute Memã Kabẽ Ny Jarẽnh New Testament in Kayapó (BR:txu:Kayapó)

copyright © 2012 Wycliffe Bible Translators, Inc.

Language: Kayapó

Translation by: Wycliffe Bible Translators, Inc.

Kayapó [txu], Brazil

### Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Kayapó

**© 2012, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-27

---

